

Monica Kock sorprendi cu Marisol kiermen cu por basha Bestuurskantoor abao numa

Herencia di Betico Croes no tin validez, placa ta tur cos!!



ORANJESTAD (AAN): Segun Monica Kock, no ta sorpresa pa MPA cu MEP no ta mira e balor di nos monumento Bestuurskantoor cu ta e simbolo di e logro di Status Aparte door di Betico Croes q.e.p.d.

Nos bestuurskantoor ta refleha nos historia riba tereno estatal. Bestuurskantoor ta e edificio na unda decisionan importante ta worde dicidi.

Nos pais ta worde dirigi desde 1986 den e edificio aki. E ta importante pa conserva e ora bestuurskantoor pa e generacionan cu ta bin despues di nos. Nos historia estatal no ta bieu manera di otro pais. Esei ta pone cu desde e comienso nos por conserva mas facil nos historia. E no ta suficiente pa pone historia riba papel so. Ora aki 100 aña muchanan ta wak bestuurskantoor nan por bisa esei ta e curazon di e pais. Gobierno mester duna e ehempel cu nos historia ta importante y cu e lo conserva esaki.

MPA ya na 2006 a bin cu un mocion pa gobierno percura cu e edificio di bestuurskantoor lo no worde basha abao asina protehando nos historia estatal. MEP ta e unico cu a vota contra e mocion aki. Placa ta mas importante cu e herencia di Betico Croes.

Riba pregunta di MPA tur Minister a splica cu ta Minister Lopez-Tromp ta esun cu ta encarga cu propiedad di gobierno. Riba pregunta di parlamentario Monica Kock Minister Lopez-Tromp a contesta bon cla cu a dicidi

pa bende bestuurskantoor y por basha abao numa. Ya caba Caya G.F. Betico Croes ta bay bira un mall y awo e bestuurskantoor tambe lo bira un mall. Betico Croes, fundador di MEP, cu nan ta yama nan lider maximo, no tin ningun balor pa e partido di MEP. E partido di MEP di

awe no ta ni respeta nan mesun fundador, lider maximo sr. Betico Croes q.e.p.q. Placa ta mas importante pa MEP di awo cu nan herencia di nan fundador. Ya pueblo a duna gobierno hopi mas placa door di BBO na unda cu dolor pueblo por sobrevive

awe. Y kico a worde haci cu e placa?

Si MEP no ta respeta ni e pasado di nos pais y su mesun fundador di su partido y ta bende esaki pa placa, ta logico cu pueblo mes no tin balor pa MEP. A logra INFRA-gebouw si pero pa conserva nos historia no ta

importante. Pueblo, manera MPA a bisa un biaha caba, Aruba ta for sale pa MEP. Ta bende y regala tur cos cu ta di Aruba. Y pueblo ta biba mas miho? No mas malo. MPA ta spera cu pueblo ta compronde awo cu MEP di awo no ta e MEP di Betico Croes q.e.p.d..